

Kinder wilt geerne older wodden en oldere mensen zollen leever wat jonger wèèn. Zo is tat! En dat vrandert nog niks. tSchient dat tat zo zal blieven. tWas vrögger teminsen ok al zo.

Toe ik nog op dee banke in de Voddense schole zatte dach ik ok dat as ik moor wat groter wazze, dak ut tan ewonnen hadde. Moor later steet toew toch ok weer neet an. En dan moj der toch moor van maken wat ter van te maken is.

Dee kinder mossen vrögger net zogoed as tegeswoordug ok altied vólle leern. En wat mosse wiej neet vólle „van buuten” leern. ”. kGleuve dat ze dat noew neet meer zo doot. kHeure teminse wel us zeggen dat alles waj könt nósloan en opzeuken in de buuke, dat hoef iej neet te leern, dát te leern is overdoad.

Moor wiej waarn door neet met kloor! Wat n joortallen hew eleerd! Wel hek altied een hoop gemak ehad van tleern zo azze wiej dat deen van de aardriekskunde. Ok noew nog.

Wiej können alle plaats en van de kaartem in ons land, behalve de hele kleinen opneumen en opdreunen! Wiej begonnen dan in tNoorden met Ulrum tut in tZuujuen onder Maastricht.

Honderden plaatse haw zo in de kop zitten! As tut tan was: woor ligt.... dan dach iej moor an dee rieje in oew kop, welke namen der veur en waffer plaasse der noa kwammen, en dan wis iej woorj mossen wèèn en woor dee plaasse lei.

Zukke metoden bunt noew te umslag tug. Ze leert neet meer zo vólle uut te kop. Veral in dee hoogste klasse hew hoopen van buuten eleerd.

Dat waarn door feitluks drie klassen. De 6den, 7den en de 8ste klasse. waarn met zon vieftug kinder in één lokaal bie mekare. Door was wel drie joor verschil in leeftied bie dee „blagen”. Dat waarn hoas gin blagen meer! Door zatten hele lummels van jonges bie, en de deerns kwammen door hups uut te kloeten, dat wodden door in dee klasse meiden en damekes! Gek, moor ik kanne mien dee deerns vólle better weer veur de gees halen as te jonges. kZal droew ue een paar opneumen. Ik holle van alles in de rieje, dus beginne ik met te A.:

Door waren een paar Aaltjes  
Zee wod vaste n betjen old  
Ze heit wel net as vissen  
Moor waarn lange neet zo kolt!  
Anna, Bep, Bertha, Coba  
De Diena's waren met zn dreeën,  
Ik zee ze dr zó weer zitten,  
Wat is tat lange eleëën!

Gerritje, Grietje en Hendrieka,  
Hentje, Jantjen en de Jo's  
As ze nog leëft, dan is twel zeker  
Bunt ut al zachjes olde moo's!  
Margje, twee Marietjes, Mieneke,  
Zee moggen drollemole wèzen,

Dee ene Marietje dee mog vake  
In onze klasse veurlèzen.  
Dree Rieka's waarn der ok nog,  
Willemien, Woltéra, leeve kinder  
Waarn t ollemool int veleëen.  
Was ter al ene us wat minder  
Ze moggen zich bes lóten zeen!

Ik mogge ze wel graag bekieken  
As zee door in de klasse waarn  
Moor tmog beslis neet blieken  
Daj daggen al an paarn!  
As ene van dee jonges stiekum  
Us met een deern alléne was Reep  
iederene kie um! Nee dat kwam neet van pas!  
Dan mos iej vólle older wèèn  
Um met deerntjes te beginnen  
tGing drumme wat te mense zèèn  
Iej heelden zo iets binnen.  
Moor toch is tat een mooie tied  
As tkind meer mens geet wodden  
En zoiets dat gebeurt now niet  
Allene in old Vodden!  
Nee dat gebeurt moor óveral  
Zoiets zal altied blièven  
Alle blagen onder ut heeal  
Ut wod tan keerls en wièven!  
Ze hadden tlinge al ewilt  
Dat zee wat older woorn  
Ut hele lichaam had etritt  
Biej t kommen van dee joorn!  
Noew zollen ze dr ók bie heurn  
En grót wèèn met de gróten!  
Noew gingen lös toch álle deurn!!  
Bunt ut gin idioten?  
As ze wat older bunt dan ist:  
Was ik moor wat jonger nog!  
Dan bliekt dat ie oe heb vegist  
Moor dan buj al vekoch!  
Dan is ter niks meer an te doon  
En moj gewoon deur lopen.  
En als moor wod iej older dan,

Gin joor kuj us vegetten!  
Zó kump de tied dat vrouw en man  
Op te droòd toe bunt vesletten!  
Noew denk iej wat een pessimist  
Dén zal wel altied klagen.  
Ik zal neet zeggen: jò zo ist,  
Moor toch hek van dee vlagen  
Dak denke: rozegeur is t neet  
As k hier en door an snuffel!  
Moor vrandren kan ik ut ok neet  
Hak moor de huid van n buffel!  
Volmaakt is ut nog nooit ewes  
En zal tok wel nooit wodden  
Dat is ut neet in ut gewes  
En netzomin in Vodden.  
Toch wilt de mense wat goeds  
Dat zúl iej ok wel merken  
En geet ut tan toch onverhoeds  
Vekeerd, dan mow dran werken!  
Beginnen bie jew eigen deur  
En ut wat mooier maken.  
Meer vrolukheid, minder gezeur,  
Zo stelle wiej onze taken!  
kZeg doorumme moor altied weer  
Neet zaneken of treuren!  
Een mense leëft moor ene keer  
Ai goed luustert dan kuj heuren  
Door zit ok mooie klanken in,  
In al het aards gebeuren!  
Ut lèven hef toch echt wel zin  
Neust dinger van een slech allooi  
Zit ter ok vólle goeds in,  
Heél vólle is ter móói!

Ome Jehan